

BEYNON, THOMAS (1744 - 1835), archddiacon Ceredigion, noddwr llenyddiaeth ac eisteddfodau Cymru

Enw: Thomas Beynon
Dyddiad geni: 1744
Dyddiad marw: 1835
Rhiant: Rachel Beynon (née Thomas)
Rhiant: Griffith Beynon
Rhyw: Gwryw
Galwedigaeth: archddiacon Ceredigion, noddwr llenyddiaeth ac eisteddfodau Cymru
Maes gweithgaredd: Crefydd; Eisteddfod; Llenyddiaeth ac Ysgrifennu; Dyngarwch
Awdur: John Williams James

Ganwyd yn Greenmeadow, Llansadwrn, Sir Gaerfyrddin, bedyddiwyd 26 Awst 1745, yn fab i Griffith Beynon a Rachel (Thomas) ei wraig. Addysg ysgol ramadegol, nid prifysgol, a gafodd.

Cyflwynwyd ef i esgob Henffordd gan esgob Tyddewi. Ordeiniwyd ef yn ddiakon 21 Awst 1768 yn Abergwili. Bu'n gurad Cathedin, sir Frycheiniog, 1768-1770, (ordeiniwyd ef yn offeiriad yn Henffordd pan ddaliai guradiaeth Cathedin), yn offeiriad plwyfol Llanfihangel Cilfargen, Llanfihangel Aberbythych, a Llandyfeisant (oll ger Llandeilo Fawr), 1770-1833, yn rheithor Llanedi 1782-6, ac yn rheithor Penboyr, 1784-1833, yn ddeon gwlad Emlyn, prebendari Clyro yn eglwys golegol Aberhonddu (Christ College), 1796-1833, ac yn archddiacon Ceredigion, 1814-1833.

Cyfrannodd lawer o'i gyflog at adeiladu eglwysi mewn mannau tan ei ofal; derbyniodd coleg newydd Dewi Sant, Llanbedr-Pont-Steffan, yn helaeth o'i haelioni. Cynorthwyodd ysgolion cylchredol [Madam Bevan \(Griffith Jones, Llanddowror\)](#), a thystiodd i allu [Morgan Rhys](#) yr emynwr fel ysgolfeistr yn ei blwyfi yn 1771-2, gan wneud cais amdano dros dymor 1772-3.

Noddodd Gymdeithas Cymreigyddion Caerfyrddin am flynyddoedd lawer, a bu'n aelod pwysig o bwyllgor eisteddfod Caerfyrddin yn 1819. Ymddiddorodd yn iaith a llenyddiaeth Cymru, a chyflwynodd amryw feirdd a llenorion lyfrau iddo, yn bennaf oll [Daniel Evans](#) ('Daniel Ddu o Geredigion'). Y mae lle cryf i gredu mai teulu [Fychaniaid](#) Gelli Aur oedd ei noddwyr.

Yn Llandeilo Fawr y bu ei gartref o 1770, ac yno y bu farw 1 Hydref 1835 a chladdwyd ef yno ar 8 Hydref.

Awdur

Y Canghellor John Williams James

Ffynonellau

Cofrestrï esgobol Tyddewi, 1761-1835

T. R. Roberts, *Eminent Welshmen: a short biographical dictionary of Welshmen... from the earliest times to the present* (1908), 17

Y Gwyllydydd, 1835, 352

Edward Jones, *Rhestr gyda nodiadau byrion, o Enwogion Cymreig o 1700 i 1900* (1908)

H. Blackwell, [NLW MSS 9252A: A Dictionary of Welsh Biography](#)

R. G. Thomas, [The Complete reading list of a Carmarthenshire student, 1763-7](#), ' *Cylchgrawn Llyfrgell Genedlaethol Cymru*, ix 354-64, am restr o'r llyfrau o ddarllenodd rhwng 1763 a 1767

Dolenni Ychwanegol

Wikidata: [Q20734420](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Nghymru a thu hwnt.

Ewch i'n [tudalen codi arian](#) am ragor o wybodaeth.

